

POSIBLES IDEAS PARA UNHA HOMILÍA CON NENOS

**A auga e o Espírito son o comezo.
Vive cada día o teu bautismo.**

1. VER: Recordamos o noso bautismo

+Podemos comezar abrindo o álbum de fotos repasando a data do noso bautismo, os nosos pais que nos sostían, os padriños, a pía bautismal, a parroquia onde nos bautizaron, o sacerdote, os xestos que nos fixo o sacerdote e o seu significado, os invitados, o banquete....

*Que te contaron daquel día? Para que nos bautizaron?
Que xestos fai o sacerdote sobre o que se bautiza?*

2. XULGAR: O comezo de algo marabilloso

-Pasado o Nadal, no evanxeo de hoxe, Xoán Bautista bautiza a Xesús con auga e di que Xesús dará o **“bautismo do Espírito Santo e lume”**. Mentres se bautizaba, **“baixou o Espírito Santo sobre el”**, oíuse a voz do Pai dicindo: **“ti es o meu Fillo, o amado, o predilecto”**.

QUE NOS QUERE DICIR? O bautismo é o comezo:

-¿Recordades dades que lle facemos ao neno? Podería parecer que é unha celebración ou uns xestos sen importancia: botámoslle a auga na cabeza, unxímoslle a fronte e o peito, acendemos unha candeia e poñémoslle un paniño branco na cabeza. Que hai detrás de todo iso?

-Comezamos a ser os fillos preferidos de Deus: recorda sempre que es fillo de Deus, o seu fillo querido, que nunca te vai abandonar, que sempre podes confiar nel. **“Ti es o meu Fillo, o amado, o predilecto”, dinos Deus a nós”**.

-Contamos coa forza do Espírito Santo: “baixou o Espírito Santo sobre el” e sobre nós, o espírito que nos dá o lume do amor, que nos guía, que nos regala a graza de Deus.

-A partir do bautismo pertencemos a unha familia (a Igrexa) que nos arroupa, nos educa, nos regala o perdón de Deus cando o ofendemos, aliméntanos co pan da eucaristía cando fraquean as nosas forzas... Nesa familia hai unha nai agarimosos, María.

-A auga e o Espírito están no comezo dunha misión que se nos encomenda, de amor, de vivir para Deus, de construír un mundo de irmáns e irmás.

Que significa para nós o bautismo? Só unha festa familiar?

3. ACTUAR: Vive cada día o teu bautismo

-Visitade na igrexa a pía bautismal na que vos bautizaron. Podédela adornar con flores para a misa do bautismo do Señor. Tomade un pouquiño da auga dela, persignádevos e dicides: *“Grazas, Señor, polo bautismo polo que son fillo de Deus e membro da familia da Igrexa”*. Na misa os pais poden achegarse á pía bautismal e facerlle a cruz na fronte.

-Cada vez que entredes nunha igrexa, achegádevos á pía de auga bendita, facede o sinal da cruz recordando o día en que Xesús “enchoupou” para sempre a vosa vida, e dicide: *“Tomando esta auga bendita e facendo o sinal da cruz quero recordar o meu bautismo. Como bautizado, entro na Igrexa para vivir máis a fondo a miña unión con Xesús e para compartir a fe con toda a comunidade cristiá. Que Deus Pai, que Deus Fillo, que Deus Espírito Santo acompañeme sempre. Que esta auga bendita sexa pois para nós salvación e vida”*.

Que ides facer? E en grupo?

A PALABRA

ISAÍAS 42, 1-4.6-7: *Mirade o meu servo, en quen me comprazo.*

Así di o Señor: **Mirade ao meu servo, a quen sosteño; o meu elixido, en quen me comprazo.** Puxen o meu espírito sobre el, manifestará a xustiza ás nacións. Non gritará, non clamará, non voceará polas rúas. A cana cascada non a crebará, a mecha vacilante non a apagará. Manifestará a xustiza con verdade. Non vacilará nin se crebará, ata implantar a xustiza no país. Na súa lei esperan as illas. *«Eu, o Señor, chameite na miña xustiza, collinte da man, formeite e fixen de ti alianza dun pobo e luz das nacións, para que abras os ollos dos cegos, saques aos cativos do cárcere, da prisión aos que habitan en tebras».*

Palabra do Señor.

- **SAL. 28:**

O Señor bendí o seu pobo coa paz.

- **FEITOS 10,34-38:** *Unxido por Deus coa forza do Espírito Santo.*

- **LUCAS 3, 15-16. 21-22:** *Xesús foi bautizado; e, mentres oraba, abríronse os ceos.*

Narrador: Naquel tempo, o pobo estaba expectante, e todos se preguntaban no seu interior sobre Xoán se non sería o Mesías, Xoán respondeulles dirixíndose a todos:

Xoán: -«Eu bautízovos con auga; pero vén o que é máis forte ca min, a quen non merezo desatarlle a correa das súas sandalias. El bautizaravos con Espírito Santo e lume».

Narrador: E sucedeu que, cando todo o pobo era bautizado, tamén Xesús foi bautizado; e, mentres oraba, abríronse os ceos, baixou o Espírito Santo sobre el con aparencia corporal semellante a unha pomba e veu unha voz do ceo:

Pai: - «Ti es o meu Fillo, o amado; en ti comprázome».

Palabra do Señor.

(Narrador-Xoán-Pai)